



## საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

---

### მეცენატი

მეცენატი, ქველმოქმედი ადამიანი, რომელიც უანგაროდ უწევს მატერიალურ დახმარებას მეცნიერების, ხელოვნების, სპორტისა და სხვა სფეროებს. ტერმინი მომდინარეობს ჩვ. წ-მდე I ს. რომაელი სახელმწ. მოღვაწის, იმპ. ოქტავიანე ავგუსტუსის მრჩევლის, გაიუს ცილინიუს მეცენატის სახელიდან, რ-იც მფარველობდა იმ პერიოდის პოეტებს (მ. შ. ვირგილიუსსა და ჰორაციუსს), მხატვრებსა და შემოქმედებით ადამიანებს.

მსოფლიოში ცნობილია მრავალი მეცენატი: ჯ. პიბოდი (1795–1869), ამერ. კომერსანტი და ბანკირი, იმდროინდელი „ფილანთროპიის მამა“; ჯ. ტატა (1839-1904), ინდოეთის „ინდუსტრიალიზაციის მამად“ წოდებული, უდიდესი კონგლომერატული კომპანია „ტატა ჯგუფის“ დამფუძნებელი; ჯ. როკფელერი (1839–1937), ამერ. მრეწველი და ქველმოქმედი, კომპანია „Standard Oil Company“-ის დამაარსებელი; ე. კარნეგი (1835–1919), შოტლანდიური წარმომავლობის ამერ. მრეწველი და ქველმოქმედი, „ფოლადის მეფედ“ აღიარებული; ფ. ნაიტინგილი (1820-1910), ინგლისელი საზ. მოღვაწე, ჯანდაცვის სფეროში ექთნის პროფესიის ფუძემდებელი; უ. უილბერფორსი (1759–1833), ბრიტანელი პოლიტიკოსი და ქველმოქმედი; კ. ბარტონი (1821-1912), ამერ. წითელი ჯვრის დამაარსებელი და სხვ.

ბოლო ათწლეულებში ცნობილი მ-ები არიან: უ. ბაფეტი (ინვესტორი, ბიზნესმენი; მიჩნეულია ამერ. ისტორიაში უდიდეს ქველმოქმედად), მ. ბლუმბერგი (ფინანს. სისტემების ანალიზის კომპანიის დამაარსებელი), ე. შმიდტი (ტექნოლ. კონგლომერაციების – Alphabet-ის და Google-ის აღმასრ. დირექტორი) და მისი მეუღლე ვენდი, ბ. გეიტსი (მაიკროსოფტის დამფუძნებელი), მ. ცუკერბერგი (სოც. მედიასერვის ფეისბუქის დამფუძნებელი) და მრავალი სხვ.

საქართველოში XIX-XX სს. ცნობილი ქართვე. მ-ები იყვნენ: *ბუბალაშვილები*, დ. *სარაჯიშვილი*, ა. *ხოშტარია*, თ. *ბალდასტანიშვილი*, ა. *დადიანი*, დ. (მიტო) *მეტრეველი* (1895-1970; ბიზნესმენი, ემიგრაციაში ცნობილი იყო როგორც მაიკლ მიტო), გ. *სიღამონ-ერისთავი* (1865-1953; იურისტი, პოლიტიკოსი, საზ. მოღვაწე), ბ. *პატარკაციშვილი*; ქალები: ე. *წერეთელი* (1857-1942), ქ. *იაშვილი* (1883-1980; კოსმეტოლოგი, მსოფლიო დონის ფერწერული შედევრების კოლექციონერი), ა. *ჯაფარიძე* (1855-1926) და სხვ. საქართველოში მ-ებს შორის განსაკუთრებული მასშტაბურობით გამორჩეულია ბ. *ივანიშვილი*.

ლიტ.: ბ უ ხ რ ა შ ვ ი ლ ი ვ., ქველმოქმედება საქართველოში XIX საუკუნის II ნახევარსა და XX საუკუნის დასაწყისში, თბ., 2017, ს ი ო რ ი ძ ე ზ., ქველმოქმედება და ქართული მსოფლგაგება, თბ., 2011; ქ ა რ ჩ ა ვ ა ლ., გამოჩენილ ბიზნესმენტა სამეწარმეო ცხოვრებიდან, თბ., 2006; ჭ ი ჭ ი ნ ა ძ ე ზ., მრეწველობის წარმომდგენნი და ისტორია ბუბალაშვილების გვარისა, ტფ., 1906.

**ლ. ქარჩავა**

---